

摘藻堂四庫全書薈要

史部

欽定四庫全書薈要

史部

明史紀事本末卷七十六

七

詳校官員外郎臣楊世綸




欽定四庫全書薈要卷八千八百八十八

明史紀事本末卷七十六

浙江提學僉事谷應泰編

鄭芝龍受撫



崇禎天啓七年六月海寇鄭芝龍等犯閩山銅山中左等處芝龍泉州南安縣石井巡司人也芝龍父紹祖爲泉州庫吏蔡善繼爲泉州知府府治後衙與庫隔一街相望芝龍時十歲戲投石子誤中善繼額善繼擒治之

見其姿容秀麗笑曰法當貴而封遂釋之不數年芝龍  
與其弟芝虎流入海島顏振泉黨中爲盜後振泉死衆  
盜無所統欲推擇一人爲長不能定因共禱於天貯米  
一斛以劒挿米中使各當劒拜拜而劒躍動者天所授  
也次至芝龍再拜劒躍出於地衆咸異之推爲魁縱橫  
海上官兵莫能抗始議招撫以蔡善繼嘗有恩於芝龍  
因量移泉州道以書招之芝龍感恩爲約降及善繼受  
降之日坐戟門令芝龍兄弟囚首自縛請命芝龍素德



善繼屈意下之而芝虎一軍皆譁竟叛去六年春遂據  
海島截商粟閩中洊饑望海米不至於是求食者多往  
投之七月劫商民船勢浸大其黨謀攻廣東海豐嵌頭  
村以為穴芝龍乃入閩泊於漳浦之白鎮時六年十二  
月也巡撫朱一馮遣都司洪先春率舟師擊之而以把  
總許心素陳文廉爲策應鏖戰一日勝負未決會海潮  
夜生心素文廉船漂泊失道賊暗渡上山詐爲鄉兵出  
先春後先春腹背受敵遂大敗身被數刃然芝龍故有

求撫之意欲微達於我兵乃舍先春不追獲盧遊擊不  
殺又自舊鎮進至中左所督帥俞咨臯戰敗縱之走中  
左人開城門求不殺芝龍約束麾下竟不侵擾警報至  
泉州知府王猷知其詳乃曰芝龍之勢如此而不追不  
殺不焚掠似有歸罪之萌今勦難猝滅撫或可行不若  
遣人往諭退舟海外仍許立功贖罪有功之日優以爵  
秩興泉道鄧良知從之遣人諭意

懷宗崇禎元年春正月工科給事顏繼祖劾福建總兵

俞咨臯下獄初巡撫朱欽相招撫海寇楊六楊七等鄭芝龍求返內地楊六給其金不為通遂流劫海上繼祖上言海盜鄭芝龍生長於泉聚徒數萬劫富施貧民不畏官而畏盜總兵俞咨臯招撫之議實飽賊囊舊撫朱欽相聽其收海盜楊六楊七以爲用夫撫寇之後必散於原籍而咨臯招之海即置之海今日受撫明日為寇昨歲中左所之變楊六楊七杳然無踪咨臯始縮舌無辭故閩帥不可不去也疏入逮咨臯下於理 三月禁

漳泉人販海芝龍縱掠福建浙江海上 六月兵部議  
招海盜鄭芝龍九月鄭芝龍降於巡撫熊文燦工科給  
事顏繼祖言芝龍既降當責其報效從之

二年春二月海盜李魁奇伏誅魁奇本鄭芝龍同黨芝  
龍忌之擊斬粵中 夏四月廣東副總兵陳廷對約鄭  
芝龍勦盜芝龍戰不利歸閩不數日寇大至犯中左所  
近港芝龍又敗寇夜薄中左所

四年春正月上召廷臣及各省監司於平臺問福建布

政使吳暘陸之祺海寇備御若何暘曰海寇與陸寇不同故權撫之但官兵狃撫爲安賊又因撫益恣致數年未息上曰前撫李魁奇何又殺之暘曰魁奇非鄭芝龍比即撫終不爲我用今鍾斌雖撫亦反側不可保也上問實計安在祺曰海上官兵肯出死力有司團練鄉兵多設火器以守爲戰勦之不難上問巡撫熊文燦暘曰文燦才膽俱優但視賊太易故前有吉了之敗祺曰鍾斌與鄭芝龍勢不兩立七月間斌擾福州撫臣計誘往

泉州前聞撫臣同芝龍討賊僂其兄賊遁去問廣東布政使陸問禮對曰廣東海寇俱自福建至舟大而多火器兵船難近但守海門勿令登陸則不爲害

五年冬十一月海盜劉香老犯福建小埕遊擊鄭芝龍擊走之

六年夏六月海盜劉香老犯長樂

七年夏四月海盜劉香老犯海豐十三月總督兩廣熊文燦奏道將信賊自陷時文燦令守道洪雲蒸巡道康

承祖叅將夏之本張一傑往謝道山招劉香老被執上  
以賊渠受撫自當聽其輸誠豈有登舟往撫之理弛備  
長寇尚稱未知督臣節制何事命巡按御史確覈以聞  
已令文燦戴罪自效

八年夏四月福建遊擊鄭芝龍合粵兵擊劉香老於田  
尾遠洋香老脅兵備道洪雲蒸出船止兵雲蒸大呼曰  
我矢死報國亟擊勿失遂遇害香老勢蹙自焚溺死康  
承祖夏之本張一傑脫歸八月香老家屬六十餘人部

屬千餘人至黃華降於溫處叅軍

十三年秋八月加福建叅將鄭芝龍署總兵芝龍既俘  
劉香老海氛頗息又以海利交通朝貴寢以大顯

十六年冬十一月設南贛兵三千以副總兵鄭鴻達統  
之

十七年春正月前兵科都給事中曾應遴薦副總兵鄭  
鴻達緩急可用詔益南贛兵二千命鴻達鎮守踰年鴻  
達以舟師守鎮江我



大清兵南下潰歸鄭芝龍降

谷應泰曰海上亡賴奸民多相聚為盜自擅不討之日久矣蓋以魚鹽蜃蛤商舶往來剽掠其間者累千金利則乘潮上下不利則嘯聚島中儼然以夜郎扶餘自大東南邊徼益騷然苦之矣泉州人鄭芝龍筦庫之子也年未弱冠爲海寇顏振泉所掠振泉愛芝龍狀貌因有寵泉死衆推為魁然而龍特饒智數桀黠喜持兩端其他無絕殊者方其

侵暴外洋也輸金於楊六緩追於洪先春黃巾未破於曹公赤眉約降於光武其持兩端者一也及其受撫內地也私鬪則勇於魁竒公戰則怯於廷對殺陳餘於泚水縱匡術於石頭其持兩端者二也又若擁兵閩越援立外藩定策功高闔門橫玉而乃陰懷首鼠百計沮軍渟沲既未合兵東吳豈能遽下居異人爲竒貨以澶淵爲孤注其持兩端者三也又若闔門既下釋甲入臣居第京師招搖海

上曾無麟閣之功但比遼東之豕隗囂侍子而身  
反於外延之在臺而子更舉兵其持兩端者四也  
夫奉先之失在於去就輕脫故依建陽則背建陽  
依董卓則背董卓牢之之敗在於天性反覆故附  
王恭則反王恭附元顯則反元顯今芝龍以盜賊  
之雄挾遨遊之智而鷹眼不化狼心已成身在樊  
籠之中志在江湖之上一旦緩急可得信乎然予  
又怪崇禎之初芝龍既撫銳意行金織皮丹珀來

自賈胡明珠文犀至皆燕兩是以薦剡頻上爵秩  
屢貶坐幹海王庵有數郡人但知元龜象齒都自  
淮來而不知寶玉大弓原從魯竊若能却盜泉之  
水則不至奪君子之器矣說在孔子之對康子也

明史紀事本末卷七十六

欽定四庫全書蒼要卷八千八百八十九

明史紀事本末卷七十七

浙江提學僉事谷應泰編

張獻忠之亂

崇禎元年延安饑府谷民王嘉胤作亂延安人張獻忠從之獻忠陰謀多智賊中號八大王其部最強旁掠延安諸郡邑

四年張獻忠率衆二千人就撫於三邊總督洪承疇

五年獻忠復叛隨賊首高迎祥紫金梁等轉寇山西諸郡縣

七年羣賊轉寇河南張獻忠犯信陽鄧州遁入應山洪承疇率諸將逐賊於河南獻忠西奔商雒遁藍鄆間與延安賊李自成陷澄城寇平涼邠州旋與羣賊出潼關寇嵩汝

八年正月諸賊盡集宛雒張獻忠東走掠廬鳳安慶二月與老回回西走商州復至秦中十一月獻忠與羣

賊自潼關出犯閬鄉靈寶東行庚申總兵祖寬大破獻  
忠於姑家廟 十二月獻忠合諸賊圍廬州分道陷巢  
縣含山遂陷和州沿江下犯江浦

九年正月張獻忠合羣賊圍滁州總理盧象昇大敗之  
賊竄河南

十年羣盜久擾河南無可掠悉入楚寇蘄黃間官軍敗  
獻忠於黃岡獻忠復入江北東掠至儀真揚州告急獻  
忠尋西走入楚

十一年正月總兵左良玉陳洪範大破賊於鄖西張獻忠請降初獻忠自良涿噪而爲盜洪範捕獲獻忠異其貌而釋之以是懷舊恩乞降於洪範請率所部殺賊自效總理熊文燦承制撫之獻忠請置家口於鄖西文燦爲請於朝詔貸其罪立功自贖獻忠乃率部曲數千居白沙界山獻忠狡而多計羣盜每以爲的其降也自言能制鄖襄荆承數百里內外無一賊文燦每曲徇其請益驕不奉法屢檄從征不應獻忠又求襄陽一郡以屯



其軍文燦議餉二萬人獻忠乞餉十萬人文燦遷延不能應十月獻忠聲言寄家口於穀城入據守之分屯羣盜於四郊十一月羅汝才亦就撫文燦安其衆於房竹間與民錯壤而處遙與獻忠爲聲援奪民禾而食不奉縣官法鄖楚偏沅諸撫咸以爲憂文燦剛而愎又新有功而驕皆不聽鄖襄人惴惴恐禍至無日矣

十二年五月張獻忠叛於穀城初賊首高迎祥既誅李自成困川西羣盜失勢獻忠連敗精銳俱盡始乞撫以

緩誅初無降意及據穀城潛勾諸賊爲犄角遂復思叛去舉人王秉貞爲之謀主至是遂殺穀城知縣阮之鈿以叛羅汝才九營並起應之獻忠脅御史林鳴球上書求封於襄陽鳴球不從遂殺之 七月熊文燦檄諸將進兵穀城獻忠焚穀城西走與羅汝才合左良玉追賊於房縣西賊設伏羅睺山良玉兵度隘入伏中賊四合圍之突圍戰敗績一軍盡沒良玉失其符印僅收殘兵數百走回房縣事聞文燦良玉俱革職殺賊自贖 九月

大學士楊嗣昌督師討賊十月至襄陽逮熊文燦論死  
十三年二月平賊將軍左良玉大破張獻忠於太平縣  
之瑪瑙山斬首萬級獻忠精銳俱盡止驍騎千餘自隨  
遁走興歸山中尋自鹽井竄興房界上左良玉屯興安平  
剗諸山連營百里諸軍憚山險圍而不攻賊伏深箐中  
重賄山氓市鹽芻米酪山中人安之反爲賊耳目陰輸  
兵情於賊獻忠得以休夏收散亡養夷傷羣盜往往歸  
之兵復振時羅汝才過天星七股賊盡入蜀 六月獻

忠自興房走白羊山入巫山隘聞川兵躡之益入深谷  
中掩息旂鼓轉入而西不知所往都司曹進功率兵入  
山偵賊不見一人而還 七月獻忠既西羅汝才屢爲  
官軍所敗勢孤率黨走合於獻忠共謀渡川西諸將賀  
人龍李國奇張應元汪雲鳳張奏凱等會師擊之應元  
雲鳳營於夔之土地嶺待賀人龍兵三檄不至初督師  
嗣昌以左良玉跋扈難制而人龍屢破賊有功請以人  
龍代良玉佩將印既而以良玉瑪瑙山捷度未可動復

奏留良玉佩印如故別加人龍總鎮銜湏後命人龍初  
聞大將之拜踴躍動三軍既報寢乃鞅鞅良玉知其故  
意亦恨當獻忠之遁伏興歸也千餘殘寇可盡乃良玉  
以奪印懷慚人龍復以歸印舐望遂逡巡不復深入致  
獻忠復熾皆嗣昌失兩帥之心玩寇故也人龍屯開縣  
每以餉乏為辭頓兵不進癸亥人龍兵噪而西歸已巳  
官軍敗績於土地嶺時張應元汪雲鳳所將楚兵五千  
皆新募未經行陣待人龍兵久不至獻忠知官軍無後

繼悉銳來攻應元雲鳳簡銳千人搏戰晨至日中未決  
賊分兵繞後山而下突入營中守營新兵皆譁賊乘之  
前後合圍二將連兵死戰應元中流矢奮擊突圍出賊  
方渡巴霧河應元馳赴河上然礮擊殺一賊帥衣緋者  
賊不得渡雲鳳苦戰久得脫渴飲水斗餘臥血凝臆而  
死兵多潰亡 九月獻忠汝才陷大昌庚寅屯夔城山  
背賊行營輜重婦女甚衆而諸軍多觀望不前但尾賊  
後所至關隘防兵多遠遁賊長驅直過二賊合兵趨達

州謀西渡 丙午賊渡河遂入巴西督師嗣昌命監軍  
萬元吉監諸軍西行尾擊賊 十月壬戌獻忠汝才陷  
劍州甲子過劍閣趨廣元直走陽平關從間道別出百  
丈山將入漢中總兵趙光遠守陽平甚嚴賀人龍李國  
奇復整兵而東賊乃踰昭化走西川丙寅川兵追賊於  
劍州敗績賊擒四將以去官軍轉戰於綿州逐北至城  
下賊渡綿河而西 十一月庚辰督師監軍元吉大饗  
將士於保寧以諸軍進止不一立大帥以統之以總兵

猛如虎爲正總統張應元爲副總統癸未發保寧趨綿  
州諸將分屯要害元吉督諸軍自間道趨射洪扼蓬溪  
以待之癸卯賊屯安岳知大兵且至宵遁走內江乙巳  
猛如虎至安岳選驍騎逐賊元吉與應元屯於安岳城  
下以遏賊歸路十二月己酉賊走瀘州賀人龍等以  
兵躡之辛亥賊陷瀘州瀘州三隅皆陡絕臨江止立石  
站一路可北走賊既走絕地元吉謀以大兵自南搗其  
老營伏兵旁塞險要蹙賊北竄永州逆而擊之可以盡



殲也乙卯元吉兵至立石站賊營先移渡南溪官軍隔水追之不及癸亥賊越成都走漢川德陽復至綿河

十四年正月丁丑獻忠汝才入巴州己卯走達州甲申賊渡違河而東往新開焚燬驛道人烟斷絕者七百里初賊南竄元吉欲從間道出梓潼扼歸路以待賊嗣昌檄諸軍躡賊急追不得距賊遠令他逸諸將皆盡向瀘州賊折而東返歸路盡空不可復遏賀人龍頓兵廣元不進己丑猛如虎率諸將及賊於開縣日暮雨作諸將

咸以人馬乏請詰朝戰叅將劉士傑曰自瀘州逐賊馳驚四旬僅而及之惟敵是求今遇賊不戰縱敵失賊誰執其咎乎請爲諸君先揮戈而進如虎亦率親兵從之士傑奮勇前搏賊陣連勝之獻忠憑高而望見後軍無繼左軍皆前却不進因以精銳繞谷中出官軍後馳而下左軍先潰士傑及游擊郭開如虎子猛先捷皆戰死前軍已覆如虎突戰潰圍出馬仗軍符盡失賊東走巫山大昌監軍元吉赴開縣收召殘兵祭陣亡諸將哀動

三軍嗣昌在雲陽聞開縣失利始悔不用諸將扼歸路之謀矣初賊之西渡違河也嗣昌策其必入秦令左良玉自興歸趣漢中及賊東走嗣昌復檄良玉自夷夔進勦使者憚行中道反命曰平賊已入漢中矣既慮其言不售也更使人給良玉曰賊向漢中矣良玉不至嗣昌之使十九返良玉曰向依督師令瑪瑙山安得功乎遂撤興房兵趨漢中賊下夔門無一人攔截者賊既度巫山晝夜疾走興房山中二月獻忠汝才走當陽鄖撫

袁繼成悉兵扼賊於房竹賊走宜城偵襄陽無備簡二十騎持符偽為官兵已酉夜至城下守者驗符信啓關賊既入即揮刀大呼殺門者城中先伏賊百餘起而應之縱火光燭天賊大隊疾馳至城中大亂門洞開庚戌昧爽賊盡入城知府王承曾突圍走兵備副使張克儉推官鄺曰廣死之賊焚襄王府執襄王獻忠據坐王宮坐王堂下勸之以卮酒曰吾欲斷楊嗣昌頭而嗣昌遠在蜀今當借王頭使嗣昌以陷藩伏法王其努力盡此

一杯酒因縛王殺之投屍火中福清王常澄逃免潛遣人索王屍已燼僅拾顱骨數寸以歸賊殺宮眷并貴陽王常法盡掠宮女發銀十五萬以賑饑民襄陽守兵數千軍資器械山積盡爲賊有初左良玉屢破賊掠其輜重盡畜之許州爲獻忠襲取良玉在鄖厓家口貲蓄於襄陽至是復盡爲獻忠有良玉聞之同鄖撫袁繼咸發兵馳援已不及癸丑賊渡江破樊城己未陷當陽郟縣乙丑陷光州新野三月丙子督師大學士楊嗣昌自

縊於軍時李自成已陷河南福王遇害嗣昌以連失二  
郡喪兩親藩度不免遂自盡監軍元吉部署行營命猛  
如虎駐蘄黃防獻忠東逞上以襄陽失陷左良玉違制  
避賊削職戴罪平賊建鄴撫袁繼咸入京 四月獻忠  
焚掠襄陽既空聞左右漸逼以兵三萬犯應山知縣章  
日輝擊却之北至隨州掠汝寧縣難民逸歸見獻忠面  
帶刀瘢二箭創一方令羣盜備乾糒為半月糧往攻固  
始陷光州漸逼麻城 革左諸賊在皖桐聞獻忠東來

自潛太至麻城勾合之將謀渡江巡撫宋一鶴擒賊諜  
焚其舟 庚午獻忠汝才合兵陷隨州知州徐世淳死

之合戶被殺吏民屠僇不遺血流成溝澮 六月左良

玉敗獻忠於南陽之西山獻忠西走與汝才合兵攻南

陽晝夜穴城知府顏日愉力拒之賊去陷信陽獲左兵

旂幟令羣盜襲以入泌陽陷之癸亥走隨州 七月丁

丑獻忠圍鄖陽鄖兵禦之多殺傷巳卯獻忠宵遁 總

兵黃得功戲下兵叛西走投獻忠獻忠陷鄖西 羅汝

才忤於獻忠北走合自成左良玉敗之於鄧州再敗之於淅川 辛卯鄖兵與獻忠戰敗績獻忠以所擒鄖兵人斷一手縱歸以辱官軍督師丁啓睿與左良玉俱屯南陽頓兵不進獻忠既拔鄖西馬騾噐甲搶獲甚盛羣盜蟻附之衆至數十萬獻忠屢勝而驕八月東掠信陽左良玉營多降將家在鄖襄多被獻忠殺掠人思致死於賊良玉乃自南陽引兵逆擊獻忠於信陽斬其首將沙賊大破之奪其馬萬餘降衆數萬獻忠負重創易服



夜遁竄入山中良玉軍聲大振降附日衆遣諸將分道窮搜獻忠戊午獻忠收餘衆數千反走向鄖陽驟遇官軍不戰而潰棄馬騾二千尚有衆二千趨南陽負創不能馳保其婦豎日行三十里部曲日逃十六七僅隨數百人辛未良玉自鄖北發獻忠已過南陽追之不及監軍御史汪承詔劾將士觀望縱賊羅汝才既北合李自成自成踞河雒有衆五十萬獻忠衆散且盡九月因汝才以奔自成初獻忠與自成並起延西以狡詐相雄

長自陷襄陽嗣昌縊死自以威名遠出自成右及敗來  
歸僅從數百騎自成方強欲屈之獻忠不為下自成怒  
欲殺之汝才知之陰選良馬五百騎資獻忠令他徙獻  
忠乃晝夜東馳與回草諸賊合入霍山扼險拒守督師  
啓睿以兵赴商城旋北行討李賊獻忠得逸山中十  
月張獻忠合六營賊復出攻舒城

十五年二月乙卯張獻忠陷亳州亳州官吏先已棄城  
走賊按兵入城三月獻忠合同回草諸賊復攻舒城

四月壬寅舒城陷時舒城無令叅將孔廷訓以兵千人同編修胡守恒率民共守七閱月廷訓降於賊勾賊攻城守恒倡舒人死守賊以洞車穴城穿者數處守恒督軍民補塞之賊射書脅降守恒燔其書於城上越三日城陷賊執守恒刃其腹被數十創以死獻忠屯舒城改曰得勝州令降將孔廷訓攻霍山河南賊袁時中以兵會獻忠乙巳獻忠合諸賊陷六安五月甲戌張獻忠襲破廬州先是獻忠遣英霍遊民陽為貿易者潛入廬

州城適督學御史以較士至郡獻忠遣賊數百負書卷  
衣青衿雜諸生應試者旅寓城中甲戌夜漏三下獻忠  
捲甲疾馳入郡城中賊縱火應之城陷學使者及備兵  
副使蔡如衡俱走知府鄭履祥死之廬州城池高深賊  
屢攻不能克至是一夕而陷獻忠歛兵退屯巢湖畧舍  
山巢縣 六月辛亥獻忠襲陷廬江焚僇一空還兵舒  
城 八月辛丑獻忠分三軍一軍上六安一軍趨廬州  
一軍往廬江三河掠雙橋巨舟二百艘復大治舟艦於

巢湖習水師因大會羣賊合水陸五十六營集於皖口  
壬子獻忠復陷六安將州民盡斷一臂男左女右總  
兵黃得功劉良佐兵救六安營於夾山嶺再戰敗績得  
功歸定遠獻忠再陷六安挫得功良佐兵謀渡江入南  
京遂僭號改元刻偽寶選自宮男子偽署總兵以下官  
九月黃得功復以大兵逐之己卯賊悉走潛山命賊  
將一堵牆為殿營於山上步騎九十哨分營為四前阻  
大溝後枕山險為持久計得功良佐捲甲疾趨夜半緣

山後諜而升賊驚起失措且前阻大溝不能成列官軍奮擊賊踰崖跳澗四潰追奔六十里斬首萬餘獻忠潰圍走一堵墻伏林中焚殺之填屍溢溪壑臭達百里奪馬騾數萬賊腹心謀士婦豎俱盡 十月丙午劉良佐再破獻忠於安慶奪馬騾五千救回難民萬餘獻忠引兵西走蘄水 十一月獻忠西入楚劉良佐旋師淮安黃得功旋師定遠 十二月獻忠復東去陷桐城屠之初獻忠西遁諸軍俱勦袁時中於潁故獻忠乘虛突出

丙戌陷無爲州遂陷黃梅壬辰陷太湖

十六年正月辛酉張獻忠以二百人夜襲陷蘄州明日  
令薦紳孝廉文學各冠帶自東門入西門出盡斬之遂  
屠蘄州留婦女毀城稍不力即被殺執守道仁和許文  
岐獻忠曾販杭州識文岐頗禮之文岐陰謀圖賊乃被  
殺時楚兵盡隨良玉東下蘄黃一帶惟土兵三百人守  
蘄水獻忠乘虛充斥三月丁酉陷蘄水屠之甲寅左  
良玉引兵自池口西上屯安慶丙辰獻忠自蘄水疾

馳至黃州乘大霧攻城黎明城陷執副使樊維城欲降之罵賊不屈賊刺之洞胸死獻忠據府自稱西王麻城諸生周文江倡亂迎降獻忠獻忠大喜偽授文江知州賊尋陷羅田五月總兵方國安率兵七千扼蘄州獻忠西向武昌武昌武備積弛闖獻交窺江漢時議募兵守城而庫藏空絀楚王有積金百萬三司長史貸金數十萬以贍軍王不應大學士賀逢聖家居倡議捐貲募兵僉謂宜募土著適承天德安潰兵俱下楚王盡募之



為軍鋒以長史徐學顏領之號楚府兵 獻忠沿江而  
上悉師破漢陽臨江欲渡武昌大震議撤江上兵嬰城  
守叅將崔文榮曰守城不如守江守江不如守漢磨盤  
煤炭諸洲淺不過馬腹縱之飛渡而嬰城坐困非策也  
議者不從賊果從煤炭洲而渡直逼城下文榮禦之小  
有斬獲賊攻武勝門文榮率諸軍拒之多殺傷壬戌楚  
府新募兵為賊內應開門迎賊文榮躍馬持矛大呼殺  
賊三人賊攢矛刺之洞腋死大學士賀逢聖與文榮俱

守武勝門城陷歸家衣冠北面再拜以巨舟載其家出  
墩子湖至中流鑿舟全家溺者十二人逢聖屍沈百七  
十日不壞十一月壬子始出葬長史徐學顏與賊格鬪  
斷左臂右手持刀不仆賊支解之楚宗多從賊者賊執  
楚王盡取宮中積金百餘萬輦載數百車不盡楚人以  
是咸憾王之愚也賊以篋輿籠王沈之西湖屠僇士民  
數萬投屍於江尚餘數萬人縱之出城以鐵騎圍而蹙  
之江中浮屍蔽江而下武昌魚幾不可食其遺民數百

多則斷手足鑿毀目鼻無一全形者獻忠遂據楚王府  
僭稱武昌曰京城偽設六部五府鑄西王之寶開科取  
士殿試取三十人為進士授郡縣官 初李自成兵臨  
漢陽不克聞獻忠取之自成怒榜示遠近曰有能擒獻  
忠以獻者賞千金及聞取武昌復遣人賀之曰老回回  
已降曹草左皆被殺行將及汝矣獻忠得書而懼多賫  
金寶報使於自成自成留其使獻忠恨之 六月丙戌  
諭平賊將軍左良玉專勦張獻忠母老師糜餉七月

辛亥方國安合左營副將徐懋德馬士秀等步騎二萬從蘄州而上夜擊賊於大冶斬首千級前鋒既勝左鎮諸軍並進獻忠聞之戊午以四賊帥守武昌為浮橋於金口悉衆西渡屯舟師於湖中謀向岳 八月丙寅方國安等進兵黃州斬偽知府癸亥諸將進次陽邏堡距武昌三舍監紀知縣吳敏師聯絡蘄黃四十八寨義勇數萬人與師會總兵常安國以舟師先進轉戰金沙州奪賊舟百艘賊騎反走焚城下諸舟嬰城自保安國等

退屯漢口 丙寅諸軍齊壓武昌而軍賊出戰大敗退

入官軍逐之遂入城賊開門西走諸將縱兵屠僂萬計  
遂復漢陽并諸屬縣 張獻忠陷咸寧蒲圻距岳州二

百里沅撫李乾德總兵孔希貴以兵二萬守城陵磯盡  
移岳州居民他避令軍士詐為居民開門迎賊賊入城  
伏發賊盡殲留四賊賊割一耳貫箭縱回以辱賊獻忠  
怒益兵進攻乾德虛立營壘道傍林中植旗幟伏大砲  
積薪其上賊以火攻之延燒積薪砲大發殺賊數百賊

益怒水陸並進乾德設戰艦中流向賊營度矢石可及  
即止不進賊連弩射良久乾德度賊矢礮且盡水陸奮  
擊大敗之三戰三捷獻忠乃悉衆二十萬圍岳州百道  
俱攻力屈城陷乾德希貴俱走長沙戊辰賊前鋒至湘  
陰湘陰民俱空城走獻忠分軍為二一軍下長沙一軍  
上荊州獻忠欲北渡卜於洞庭湖神不吉三卜神終不  
許庚辰獻忠歛舟湘潭數千艘將北渡忽大風起覆舟  
百餘溺死數千人因復還岳州盡殺所掠婦女投屍江

中焚其舟火延四十里江水夜明如晝遂陸行向長沙  
甲申至城下長沙人民先已走李乾德奉吉王惠王走  
衡州丙戌長沙陷總兵尹先民何一德降賊巡撫王聚  
奎單騎走江夏推官蔡道憲死之先是武昌陷聚奎南  
奔長沙道憲請還屯岳州謂岳與長沙唇齒也併力守  
岳則長沙可保而衡永無虞聚奎屯岳數日仍南徙驅  
萬人入長沙所過如洗慘甚於賊尋遁入湘潭及賊至  
城下呼推官曰吾軍中皆知爾名可速降毋自苦也道

憲挽強弩射之獻忠怒攻三日夜而城陷執道憲百計誘降不屈磔之健卒林國俊等九人追侍道憲不去賊勸道憲降時國俊曰如吾主可降亦去矣不至今日賊云爾主不降爾亦不得生國俊曰若我輩願生亦去矣不至今日賊併殺之內四卒奮然曰願且延旦夕葬主骸而後受刃賊義而許之於是四卒解衣裹骸葬之南郭畢四卒自經死獻忠既陷長沙設立偽官大書偽榜馳檄遠近降賊將先民一德願效前驅進取江西獻忠



悅偽封世襲伯 庚寅賊襲陷衡州桂王及吉惠二王

走永州九月獻忠拆桂王府殿材至長沙構造宮殿遣

兵南追三王至永州巡按湖南御史劉熙祚督水師禦

之遣兵護三王南行入廣西而自入永州死守奸人內

應開門迎賊熙祚被賊執賊欲脅降之不屈囚之永陽

驛中閉目絕食題絕命詞於壁賊再三諭降之臨以白

刃熙祚大罵不已遂遇害於是全楚皆陷 戊戌官軍

入岳州初獻忠陷岳州置偽官守之悉率羣賊南畧地

官軍進復之偽官俱伏誅 獻忠屯衡州復分軍為三

一軍往永州一軍入廣西全州一軍犯江西袁州獻忠

歸長沙開科取士 丙辰賊前鋒至袁州獻忠至萍鄉

知縣棄城走萍鄉士民牛酒遠迎賊路相屬戊子賊陷

萍鄉盡焚公廨屋廬空其城獻忠歸長沙分兵徇攸縣

分宜 十月甲子賊陷萬載於是瑞安臨江新喻分宜

之人俱空 獻忠遣別將趨連州南贛兵備副使王孫

蘭駐韶州兵不滿百聞之遽自經知府踰城遁韶民盡

逃 袁州迎降於賊賊陷袁州左良玉以副總兵吳學

禮援袁州次於分宜 甲戌進圍袁州偽將丘仰寰拒

守都司高山奮身先登斬賊二千四百奪馬六百擒斬

丘仰寰遂復袁州時江西袁州吉安臨江人民多徙山

谷官兵淫殺獻俘三郡民所在屯結以拒官軍江西巡

撫郭都賢檄撤兵回九江招土著戍三郡官兵既撤賊

自長沙突至吉安丁丑備兵副使岳虞繼方閱軍於郊

俄報賊至皆潰虞繼走戊寅吉安陷諸縣同日而陷賊

設偽官改吉安為親安府廬陵為順民縣賊將張其在  
發偽檄馳下袁州兵民皆傾城先竄賊復入袁州 獻  
忠在長沙增兵為九營四營皆老卒五營皆新附左良  
玉令馬進忠諸將馳兵赴袁州馬士秀以步兵上臨湘  
岳州令惠登相規復襄陽劉洪起規復南陽 乙酉獻  
忠遣賊將馬賜下臨湘取米及釜方國安遣兵進扼於  
蒲圻 十一月壬辰江督呂大器兵復吉安 癸巳獻  
忠遣四賊將下岳州沿江設伏藏輕舟於汊港以巨艦

載輜重順流下副將王世恭楊文富以兵三千邀擊之  
賊逆流陽走以誘官軍官軍爭利汴流上盡奪其資入  
舟舟重不能速行賊輕舟四出圍之夾岸賊兵邀擊官  
軍殺溺無算方國安等諸將合兵救之僅奪回文富世  
恭喪師二千舟二百艘岳州軍民空城走賊疾趨復陷  
之壬寅詔承天太監何志孔勞良玉軍以恢楚有功  
加良玉少師蔭一子吏士各陞秩大賚各軍詔良玉移  
鎮武昌良玉令馬士秀趨長沙搗賊後令馬進忠等趨

袁吉迎擊其前甲寅馬士秀等復臨湘賊奔岳州諸將追至岳州賊將混天龍步騎數千拒南岸以輕舟數十順流下邀官軍士秀三分其軍以殿後者交射南岸賊乘風直上繞賊舟後反擊之賊大敗盡奪其舟南岸賊疾入城士秀麾諸軍登岸四面乘城鱗次入賊突門復走長沙斬首四千餘級遂復岳州 乙卯馬進忠等進兵分宜賊盡竄袁州丙辰進趨袁州賊開門西走諸軍逐之三十里復袁州盡誅諸偽官斬首三千級奪賊馬

五百弓矢數萬 十二月張獻忠遣兵陷建昌又陷撫  
州南豐 獻忠遣人通好於老回回時老回回為李自  
成據荊州獻忠與修舊好合兵李自成既入關獻忠益  
橫荊岳間 丁亥獻忠前鋒艾四轉戰至蒲圻馬進忠  
禦之再戰敗績

十七年正月張獻忠自岳陽渡江虛設偽官於江南大  
隊俱往江北遂棄長沙造浮橋於三江口以一軍過荆  
州盡棄舟楫步騎數十萬入夔州 二月方國安馬進

忠復長沙左良玉遣兵追賊於沙陽 六月張獻忠陷

涪州瀘州蜀王告急請濟師於南都左良玉兵屯德安

獻忠順流陷佛圖關遂圍重慶悉力拒守四日而陷瑞

王闔宮被難舊撫陳士奇死之賊屠重慶取丁壯萬餘

剝耳鼻斷一手驅狗各州縣兵至不下以此爲令但能

殺王府官吏封府庫以待則秋毫無犯由是所至官民

自亂無不破竹下者 八月張獻忠進陷成都蜀王闔

宮被難巡撫龍文光暨道府各官皆死之獻忠大索全



蜀紳士至成都皆殺之既而懸榜試士諸生遠近爭赴  
獻忠以兵圍之擊殺數千人咸挾筆握策以死蜀中士  
類俱盡復大殺蜀民全蜀數千里蕭條絕無人跡時中  
原多故諸將無暇西顧獻忠遂庵有兩川李自成敗益  
發兵攻漢中陷之獻忠逡巡自守不敢出未幾獻忠以  
病死於蜀中

谷應泰曰昔者周書越人閔不畏死三輔縱橫持  
斧而出以至鄭苦荏苒之警楚定僕區之法草竊

奸宄自古患之矣然未有自秦寇晉豫由豫入楚  
蜀轉掠江右旋犯粵西二十餘年之間取肝益膳  
流血成渠里落蕭條宗社顛覆若張獻忠之甚者  
也考獻忠與李自成因饑煽亂並起延安孫恩甫  
叛盧循即興仙芝既起黃巢來附同惡相濟若連  
矢然天禍人國以有此孽耳其時掩捕渠魁賑卹  
餘黨用張京兆之鳴鼓兼汲長孺之發粟平定安  
集一長吏事也奈何燎原莫撲滋蔓難圖嘯聚爲


羣旁抄郡邑楊太作而湖湘悉陷黃巾起而山左  
不平使天子有西顧之憂蒼生有喋血之患者揆  
厥亂源誰執其咎哉然而獻忠無他技巧止以陰  
謀多智豪暴嗜殺可乘之敝正自不少耳方夫賊  
師屢挫其弱可擒賊氣方張其驕可掩賊黨內携  
其釁可間也假令良玉太平之捷精銳俱盡得功  
潛山之捷屍填溝壑便當乘勝追奔不令逸去即  
子儀克新店而收東京懷仙克河陽而滅朝義故

曰其弱可擒也又若襄陽初陷獻忠橫恣六安再  
下獻忠改元若能轉敗為功出彼不意即元濟氣  
盛而李愬夜襲淮蔡潁川甫陷而長源規取范陽  
故曰其驕可掩也又若南陽之敗自成蓄謀以圖  
漢陽之取自成懸金以購若能用謀出奇兩虎自  
鬪即呂布交踈於袁術慶緒授首於思明故曰其  
釁可間也乃諸臣計不出此而天與不取地險坐  
失遠棄漢川近防江夏纔屯石站已渡南溪以至

萬元吉才同崔浩不竟其用李乾德孔希貴智埒  
淮陰勢絀而走賀逢聖蔡道憲忠比睢陽力盡而  
死比至歲月遷延四分五裂師老財匱而天下之  
大勢去矣然予以元和討賊全倚裴度建興恢復  
獨任武侯而楊嗣昌者白面書生不嫻將畧寇氛  
剽銳即非郝愔之移疾大藩蹂躪便同孟昶之仰  
藥雖復引而自裁亦云無媿而應元士傑尚昧發  
蹤如虎人龍終乖駕馭譬之次律陳濤之敗中軍

石頭之刎爲法受惡亦所不得辭也論者又以獻  
猶據蜀闖則犯闕按法行誅薄乎減等而不知獻  
亂以來材賦絀於吳楚士馬斃於荆襄民命塗於  
中野夫是以瓦解土崩一蹙而壞譬猶人之死也  
獻繫其手而後闖刺其心獻搃其胸而後闖扼其  
吭則獻之與闖厥罪維均也窮竒禱杌又可以九  
品差次乎哉

明史紀事本末卷七十七



總校官庶吉士臣張能照

校對官編修臣莫瞻菴

謄錄監生臣于世第

欽定四庫全書叢要

史部

明史紀事本末卷七十八

詳校官員外郎 臣 楊世綸






欽定四庫全書薈要卷八千八百九十

明史紀事本末卷七十八

浙江提學僉事谷應泰編

李自成之亂

  
懷宗崇禎元年延安大饑不沾泥楊六郎王嘉胤等率  
衆掠富家粟有司捕之急遂揭竿為盜米脂人李自成  
性狡黠善走能騎射家貧為驛書往投焉已而叅政洪  
承疇擊賊破之不沾泥等相次俘獲自成走匿山澤間

得免

二年冬十月都城警詔天下勤王山西巡撫耿如杞入  
援兵潰於涿州叛走秦晉間山谷李自成出與之合旬  
日間衆至萬餘推高迎祥為首稱闖王轉寇山西河南  
賊中稱李自成為闖將已而官軍擊迎祥斬之羣盜推  
自成為王

七年總督洪承疇率總兵曹文詔等先後勦諸賊斬獲  
甚衆羣賊悉奔入商雒興平大山中衆潰散李自成與

張獻忠奔盤鄠間 六月總督陳奇瑜圍李自成於漢

中車廂峽會連雨四十日賊馬乏芻死者過半弓矢俱

脫賊大窘自成乃自縛乞降奇瑜許之各給免死票回籍

自是復縱橫不可制矣 秋七月李自成陷澄城圍郃

陽聞洪承疇兵至解圍去轉寇平涼邠州 八月李自

成陷真寧殺知縣趙躋昌洪承疇兵至賊棄金帛餌官

兵竟西遁屯乾州招之不聽 十月總兵左光先擊李

自成於高陵富平間斬首四百餘級自成佯求撫於監

軍道劉三顧真寧知縣王家永遠信之出城招諭失其印三顧逆其詐即入堡自守賊走涇原

八年羣賊盡集宛雒李自成獨留秦中其衆七八萬總督洪承疇邀擊連敗之秦中郡縣俱堅壁清野賊饑疲東西分竄退屯興平武功諸渠計窮乞撫以緩兵陰遣諸賊攻掠山谷堡塞搜掘巨室窖藏芻糧盡為賊有賊既得食復連營走漢中為西兵所挫東走邠寧環慶其衆漸散會承疇以寧夏兵變旋師邊鎮自成得收餘燼

復振突出潼關守將艾萬年等兵俱潰

九年春正月李自成出河南攻固始左良玉遇自成於  
閿鄉相持六日總兵陳永福援之敗之於朱仙鎮自成  
走登封密縣 三月李自成誘別部賊入河南當官兵  
而自帥麾下奔漢南循南山險阨遵商雒而行復出陝  
西官軍敗績於羅家山失亡士馬無算自成自郿州至  
延綏 夏四月李自成欲往綏德渡河入山西定邊副  
將張天機力戰却之賊沿河犯朝邑將圍綏德延綏總

兵俞翀霄引兵逐賊陷賊伏中翀霄被執綏延精卒盡  
覆賊分陷米脂延安綏德賊本延安人至是再入延安  
衣錦繡畫遊街其親戚故從亂者益衆

十年春正月官軍敗績於寶鷄李自成寇涇陽三原西  
安大震賊勢益熾冬十月丁酉李自成同過天星九  
股陷寧羗分三道入西川自成自七盤關度朝天閣戍  
戍至廣元壬寅陷昭化癸卯過劍閣甲辰陷劍州乙巳  
陷梓潼黎雅叅將羅尚文大敗賊於廣元斬首千級賊

自梓潼分為三一走潼川一趨綿州一入江油遂陷青  
川彰明鹽亭諸縣圍綿州庚戌賊漸逼成都土寇蟻附  
之巡撫王維章次保寧畏賊不敢出丙辰賊焚郫縣詔  
草維章職以傳宗龍巡撫四川

十一年二月李自成陷瀘溪陝寇盡聚川西總督洪承  
疇檄川中諸道兵嚴守要害賊因乏食承疇以川師誘  
之陝兵設伏於梓潼自成率羣賊逐川兵川兵走伏發  
賊大敗斬首千餘幾殲之自成率殘衆數千走溪南了

身入楚依張獻忠不許至竹溪獻忠謀殺之自成獨乘  
騾日行六百里走商雒至浙川老回回營卧疾半年餘  
老回回授以數百人仍出剽掠其同自成入川諸賊仍  
出階文向陝西

十二年九月秦兵大破李自成於函谷自成衆散畧盡  
其部下相繼俱降自成竄漢南秦兵蹙之於北左良玉  
阨武關以南自成窮蹙不得他逸食且盡自經者數四  
養子李雙喜救之自成因令軍中盡殺所掠婦女以五



十騎衝圍而南初諸將困自成峭函諸山中斷其要害  
合圍甚密將坐斃之督師大學士楊嗣昌曰圍師必缺  
不若空武關一路設伏商雒鄖均以待之可一擊而盡  
也自成乘隙突走諸將不能禦遂自武關逃入鄖陽息  
馬深山中時河南大饑饑民所在為盜自成乃自鄖均  
走伊雒饑民從者數萬勢復大振 十二月自成圍永  
寧雲梯肉薄攻城陷之焚殺一空殺萬安王采鏗連破  
四十八寨土賊一斗穀等羣盜響應遂陷宜陽衆至數

十萬杞縣諸生李巖為之謀主賊每以剽掠所獲散濟  
饑民故所至咸歸附之其勢益盛

十四年春正月李自成圍河南府福王募死士逆戰斬  
獲頗多賊引退賊以大砲環攻城城守嚴不動及昏而  
退總兵王紹禹兵有馳而呼於城上者外亦呼而應之  
紹禹兵即執副使王胤昌於城上紹禹馳解之諸軍曰  
賊已在城下即總鎮其如我何揮刀殺守陴者數人守  
陴者皆驚墜堞賊緣堞而上叛兵迎之賊遂入賊焚福

王府福王及世子俱繞城走士民被殺數十萬執副使

王胤昌以下各官皆不死惟一典史不屈見殺河南方

大饑通判白尚文墜城死其屍為饑民所食頃刻盡自

成發藩邸及巨室米數萬石金錢數十萬賑饑民先是

自成聞福藩最富為謀已久適陝西叛兵數百逃至河

南巡撫招至城中禦寇事聞詔逮其首惡數人解京正

法叛兵大懼乃陰勾自成襲河南為內應故一夕而陷

丁酉自成跡福王所在執之并執前兵部尚書呂維

祺維祺遇王於西關謂王曰名義甚重毋自辱王見自成  
大怖泥首乞命自成責數其失遂遇害賊置酒大會  
以王為薶襍鹿肉食之號福祿酒維祺罵賊不屈死世  
子逸走遇亂兵刦之裸而奔於懷慶是時羣盜輻輳自  
成自稱闖王雄諸賊變聞上震怒建總兵王紹禹磔之  
籍其家二月李自成搜掘河南富室窖藏席捲子女  
玉帛捆載入山以書辦邵時昌為總理官令守河南府  
巡撫李仙風偵賊已去引兵至城下時昌閉門拒守尋

開門迎官軍仙風收時昌斬之 戊午自成合羣盜圍  
開封開封城為宋汴京金完顏亮益加增築土堅厚五  
丈賊以洞車數百障壯士多具犁鋤斧鑊環傳城鑿而  
穴之七晝夜不息鑿之深者四丈有奇巡按高名衡率  
司道官嬰城固守賊兵砲及城中殺傷相繼軍餉告匱  
周王恭枵出庫金五十萬買米麥日夜煮飯屑麥餉守  
陴者復懸金募死士能擊死一賊者予五十金兵民踴  
躍共擊賊斃者甚衆賊懼退數舍 李仙風督諸將高

謙等馳至開封陳永福背城而戰一日三捷賊退開封  
解嚴仙風與高名衡互相訐奏詔逮仙風仙風聞之自  
縊遂以高名衡巡撫河南 壬辰李自成陷歸德 四  
月甲子進陝督丁啓睿兵部尚書代楊嗣昌督師討賊  
時嗣昌討賊無功飲藥死啓睿督秦師至潼關 左良  
玉自襄陽進擊李自成至南陽自成北出屯於盧氏永  
寧寶豐舉人牛金星向有罪當戍邊降於賊自成以其  
女為妻金星薦卜者宋獻策善河洛數獻策長不滿三

尺見自成獻圖識云十八孩兒當主神器自成大喜拜  
軍師 五月乙亥賀人龍破李自成於靈峽山中高名  
衡屯開封保定總督楊文岳屯禹州左良玉屯南陽張  
獻忠羅汝才漸北向思合於自成猛如虎進阨德安黃  
州疽發背退屯承天 癸巳赦兵部尚書傅宗龍出之  
獄以右侍郎都御史督陝西兵討賊 羅汝才不合於  
張獻忠七月自內鄉淅川走鄧州與自成合營時自成  
有衆五十萬復得汝才軍衆益熾九月張獻忠衆散於

南陽以數百騎奔自成自成將殺之汝才以五百騎資  
獻忠獻忠東奔合回草 丁丑陝督傅宗龍率兵四萬  
次新蔡與保督楊文岳之兵會賀人龍李國奇將秦兵  
虎大威將保定兵共結浮橋渡汝合兵趨項城戊寅兩  
軍畢渡走龍口是日自成汝才亦結浮橋於上流將趨  
汝寧覘官軍至盡伏精銳松林中陽驅諸賊自浮橋西  
渡人龍使候騎覘賊還報曰賊渡河向汝矣己卯宗龍  
文岳兩軍並進次孟家庄諸將以士馬俱疲請詰朝戰



諸軍遂弛馬甲散行墟落以求芻牧賊覘之突起林中搏官軍人龍歛兵不戰國奇迎戰不勝兩軍俱潰人龍大威北奔國奇從之賊以步兵攻二督營以火礮擊却之日暮賊引去保定兵宵潰文岳夜奔項城宗龍獨立營當賊壘壬午飛檄人龍國奇以兵還救二帥不應以兵走陳州宗龍穿塹築壕以拒賊賊亦穿壕二重以困之宗龍兵食盡乃殺馬騾以享軍馬騾復盡殺賊取其屍分噉之辛卯營中火器弓矢俱盡宗龍簡卒尚有六

千夜漏二下潛勒軍突賊營潰圍出諸軍星散宗龍徒步率散卒且戰且走壬辰至項城賊追之被執至城下賊呼於門曰我秦督官軍也請啓門納秦督宗龍大呼曰我秦督也不幸墮賊手左右皆賊耳毋為所紿賊唾宗龍宗龍罵曰我大臣也殺則殺耳豈能為賊詐城以緩死賊抽刀擊宗龍中腦而仆復厲聲罵賊斫其耳鼻死城下人龍國奇俱歸陝賊獲衣甲器械無算遂陷項城屠之分兵屠商水扶溝所在土寇蠭起騷動詔復宗

龍兵部尚書太子太保 戊戌督師丁啓睿自商城北

發檄左良玉兵共擊李自成楊文岳招集散亡於陳州  
兵稍集自成汝才合兵陷葉縣殺守將劉國能初國能  
與自成汝才同為賊結兄弟十二年左良玉大敗國能  
於陳州國能率衆萬人降汝才恨之誓殺國能至是聞  
國能在葉乘勝拔其城執國能責其負約殺之詔贈國  
能左都督賊移兵陷泌陽 十月張獻忠糾回草左諸  
賊自霍太北行會李自成河南諸土寇以兵畢赴自成

衆逾百萬 左良玉兵至臨潁臨潁為賊守良玉攻破  
屠之盡獲賊所掠自成怒合兵攻良玉良玉退保郢城  
自成汝才圍之良玉悉兵拒守賊陷襄城 十一月陝  
西巡撫汪喬年率馬步三萬總兵鄭家棟牛成虎賀人  
龍將之趨河南先是喬年於陝西發李自成先塚得小  
蛇即斬蛇以徇誓師兼程進兵以輕騎萬餘抵郟縣時  
襄城新破喬年遲疑不敢進襄城貢士張永祺率邑人  
出迎官軍屯於城下自成聞之解郢城之圍來迎戰喬

年安營未定有二將先逃官軍大潰賊乘之一軍盡覆  
喬年以數百人入城居守五日襄城復陷喬年自刎未  
殊被執見殺自成深恨諸生遂剗刖百九十人又購永  
祺永祺匿免屠其族人九家殺守將李萬慶萬慶乃降  
將射塌天也自成再破秦師獲馬二萬降秦兵數萬威  
鎮河雒乘勝圍南陽數日城陷總兵猛如虎死之唐王  
遇害楊文岳屯杞縣丁啓睿屯汝寧太監劉元斌率京  
軍救河南聞南陽陷乃擁婦女北去俄上命御史清軍

元斌倉皇悉沈之於河 十二月李自成連陷涇川許  
州長葛鄆陵鄆陵知縣劉振之力誅衣冠北向再拜自  
劉死自成汝才合兵陷禹州徽王遇害復圍開封巡撫  
高名衡總兵陳永福等竭力守禦周王貯庫金於城頭  
擒一賊者予百金斬一首者五十金戰沒者卹其家五  
十金傷者以輕重為差殺賊甚衆永福射中自成左目  
自成屯朱仙鎮內鄉鎮平唐縣新野俱降於賊鄧州知  
州劉振世死焉

十五年春正月李自成攻開封益急洞車附城鑿城塼  
土而空之廣數尺實以火藥燃之一烘而裂曰小放窟  
城縱橫數丈實火藥燃之一發震天曰大放癸未賊以  
精騎數千布圍於外執汴人畚土穴城為大窟十餘輦  
火藥數萬斤百炬齊燃賊擐甲持矛望城崩將擁入賊  
穴城畚其土礮於外累累成阜火藥一發崩天輒在皆  
飛鳴外嚮賊之布圍於外者人馬成血糜城之未穿者  
堅如石猶尋丈賊駭解圍去南陷西華起孫傳庭兵部

侍郎總督陝西兵勦寇 三月庚午李自成羅汝才合

羣盜八十萬圍陳州兵備副使關永傑率士民死守賊

周圍四十里更番進攻永傑力竭城陷戰死城上鄉紳

崔必之舉人王受爵等咸手刃數賊被執罵賊死賊怒

屠陳州辛卯陷睢州陷大康遂圍歸德府歸德無兵民

自為守乙未賊鱗次穴城城陷賊乘勝陷寧陵考城

夏四月孫傳庭檄召諸將於西安聽令固原總兵鄭家棟

臨洮總兵牛成虎援勦總兵賀人龍各以兵來會傳庭



大集諸將縛賀人龍坐之旗下而數之曰爾奉命入川討寇開縣譟歸猛帥以孤軍失利獻賊出桀職爾之由爾為大帥遇寇先潰致秦督秦撫委命賊手一死不足塞責也因命斬之諸將莫不動色因以人龍兵分隸諸將刻期進討人龍米脂人初以諸生効用佐督撫討賊屢殺賊有功總全陝兵叛將劇賊多歸之人龍推誠以待徃徃得其死力襄城之役朝廷疑人龍與賊通密勅傳庭殺之賊聞人龍死酌酒相慶曰賀風子死取關中

如拾芥矣 癸亥李自成羅汝才合羣賊復攻開封先是賊再攻不克士馬多殺傷羣賊畏憊日逃亡數千賊乃申約圍而不攻以坐困之五月李自成分兵陷開毫六月命侯恂以兵部侍郎總督援勦官兵討賊與孫傳庭協力援開封七月賊圍開封久守臣告急詔援勦總兵許定國以山西兵渡河援之定國兵潰於覃懷已巳督師援勦諸軍潰於河上時督師丁啓睿保督楊文岳合左良玉虎大威楊德政方國安諸軍次於開封朱仙

鎮與賊壘相望啓睿督諸軍進戰良玉曰賊鋒方銳未  
可擊也啓睿曰汴圍已急豈能持久必擊之諸將咸懼  
請詰朝戰良玉以其兵南走襄陽諸軍相次而走督師  
營亂啓睿文岳聯騎奔汝寧賊渡河逐之追奔四百里  
喪馬騾七千兵數萬俱降賊啓睿敕書印劍俱失事聞  
詔逮啓睿下獄文岳草職聽勘八月開封久困食盡人  
相食周王先後捐庫金一百二十餘萬復捐歲祿萬石  
以養兵國廩空虛宮人咸有饑色詔山東總兵劉澤清

援開封澤清以朱家寨距城八里提兵五千渡河為營  
列水環之達於大堤築甬道以運糧則救援可濟遂往  
立營賊攻之三日諸兵不至澤清引兵去時羅汝才營  
亦食盡謀他徙自成乃分糧以餽之約破開封以東隅  
屬之汝才汝才乃留不去開封城北十里枕黃河巡撫  
高名衡推官黃澍等城守且不支恃引河水環濠以自  
固更決隄灌賊可潰也李自成遣兵攻陷歸德推官王  
世琰死之九月河決開封賊先營高處然移營不及亦

沈其卒萬人河流直衝入城勢如山岳自北門入穿東  
南門出流入渦水水驟長二丈士民溺死數十萬巡撫  
高名衡陳永福咸乘小舟至城頭周王府第已沒從後  
山逸出西城樓率宮眷及諸王露棲城上雨中七日督  
師侯恂以舟迎王庚寅總兵卜從善以水師至開封城  
上推官黃澍從王乘城夜渡達隄口諸軍列營朱家寨  
賊乘高據筏以矢石擊汴人之北渡者城中遺民尚餘  
數萬賊浮舟入城盡掠以去河北諸軍以大礮擊沈其

前鋒奪回子女五千人舊河故道清淺不盈尺歸德隔  
斷在河北邳毫以下皆被其災汴梁佳麗甲中州大隄  
之上絃管紛咽羣盜心艷之前後三攻汴士馬死者無  
算賊積恨矢必拔久懷灌城之謀顧以子女珍寶山積  
不忍棄之水族憤其城久不下河大決百姓生齒盡屬  
波臣斷垣蠹水上數堞隱見而已黃澍以守禦功詔授  
御史回草左諸賊北合於李自成孫傳庭率兵至  
南陽李自成羅汝才西行逆之傳庭設三覆以待牛成

虎將前軍左勦將左鄭嘉棟將右高傑將中軍成虎陽  
北以誘賊賊奔逐入伏中成虎還兵而鬪高傑董學禮  
突起翼之左勦鄭嘉棟左右橫擊斬首千餘級賊潰東  
走追之賊盡棄甲仗軍資於地官軍爭取之無復步伍  
賊覘官軍囂反兵乘之左軍先潰諸軍繼之喪材官將  
校七十有八人賊倍獲其所喪焉 冬十月李自成復  
陷南陽屠之回兵屯開封北孫傳庭以兵敗上書自劾  
詔傳庭圖功自贖自成汝才合兵趨汝寧 十一月孫

傅庭治兵於登封收斬逃帥進兵汝寧賊游兵窺懷慶  
欲北渡劉澤清禦卻之 閏十一月己酉李自成合諸  
賊圍汝寧監軍孔貞會以川兵屯城東楊文岳以保定  
兵屯城西賊兵進攻相拒一晝夜川兵潰保定兵不支  
庚戌賊四面環攻戴扉以障矢石雲梯如牆而立城上  
矢石俱下賊死傷衆而攻不休一鼓百道竝登執文岳  
及分巡僉事王世琮於城頭文岳世琮厲聲罵賊賊怒  
縛文岳等以大砲擊之洞胸糜骨以死世琮初授河南



推官屢却賊射矢貫耳不動號王鐵耳賊屠士民數萬  
燔燒邸舍無遺丁已拔營走確山向襄陽掠崇王由櫝  
及世子諸王妃嬪以行左良玉自朱仙鎮南潰久屯  
襄陽諸降卒附之有衆二十萬其餽於官者僅二萬五  
千餘俱因糧村落襄人不聊生十二月李自成羅汝  
才合兵四十萬由唐縣而西良玉結營襄陽近郊大造  
戰艦於樊將避賊入郢襄人怨其淫掠縱火焚之良玉  
怒掠荆襄巨估舟載軍資婦女其中而身率諸軍營樊

城高阜賊勢既盛襄民咸焚香牛酒以迎戊辰賊以數萬騎至樊城良玉乘高飛礮擊殺賊千餘騎賊從間道至白馬渡臨江欲渡良玉移營拒之賊不得渡良玉拔營而南賊亦不敢逼自成切齒於良玉每戰必力良玉懼不敢復與爭鋒故恒避之鄖撫王永祚跳城走已已襄陽陷賊分兵陷夷陵宜城荆門向荆州良玉全師出漢口遂下武昌次於金沙洲賊逼荆州甲戌偏沅巡撫陳睿謨棄荆州奉惠王走湘潭自成遣賊將馬守應據

夷陵以犯澧賀一龍趨德安窺黃麻辛巳自成至荊州士民開門迎之賊入荊州荊州諸縣土寇蠭起

十六年春正月李自成圍承天知府開門迎賊巡撫宋一鶴時守城下城巷戰將士勸之走一鶴不聽揮刀擊殺賊數人死鍾祥知縣蕭漢有賢聲賊戒其部曰殺賢令者死無赦乃幽之寺中戒諸僧曰令若死當屠爾寺僧謹視之漢曰吾盡吾道不礙汝法遂自經賊改承天府曰揚武州遂犯顯陵巡按李振聲守陵迎降賊賊列

之上班振聲自以與賊同姓肩輿出入營中揚揚自得  
自成坐陵殿大會羣賊欽天監博士楊永裕亦降於自  
成自稱天文禮樂兵法地理俱該洽請賊發顯陵忽大  
聲起山谷若雷震賊懼而止分兵陷潛江京山諸縣遣  
賊將攻德安乙巳陷雲夢丙午陷孝感丁未自成汝才  
至黃陂知縣懷印走賊設偽令黃陂士民殺偽官賊怒  
反兵攻黃陂屠之夷城垣為平地戊申陷景陵賊別將  
陷德安自成馳檄黃州指斥乘輿偽託仁義以誘遠近

黃州守將王允成棄城順流東下掠江上客舟大擾江  
南北方國安諸將退屯漢口賊大隊逼漢陽左良玉自  
金沙渚東下九江遂至於蕪湖初自成流劫秦晉楚  
豫攻剽半天下然志樂狗盜所至焚蕩屠夷既而連陷  
荆襄鄢郢席卷河南有衆百萬始侈然以為天下莫與  
爭思據有城邑擅名號矣羣賊俱奉其號令推自成為  
奉天倡義文武大元帥號汝才曰代天撫民德威大將  
軍自成據襄陽號曰襄京其餘所陷郡縣俱改易名號

修襄王宮殿設官分職武官有權將軍等九品文官有  
太師六政府諸品封崇王由櫝為襄陽伯卽陵王在鉞  
保寧王紹炆肅寧王術授俱降賊改封伯偽吏政府侍  
郎喻上猷薦列荊州紳士賊下檄徵之江陵舉人陳萬  
策李開先在所薦中偽檄下萬策自經開先觸墻死楊  
永裕又勸進牛金星不可乃止 二月庚午李自成遣  
賊陷麻城城空無人賊回屯德安自成分兵為四老回  
回守承天羅汝才守襄陽草裏眼往黃州自將其一癸

未自成攻邾縣知縣李貞率士民堅守一晝夜殺傷甚衆賊百道環攻一鼓而拔縱兵大殺李貞大聲叱賊曰驅百姓死守者知縣耳妄殺何為罵賊不已自成怒褫其衣倒懸於樹貞大呼曰高皇帝有靈我必訴之上帝以殺賊賊斷其舌副之母喬氏及妻俱死三月乙未澧州土賊勾李自成陷常德常德富強甲湖南生齒百萬積粟支十年巡撫陳睿謨遇賊於邾先奔士民無固志賊遂陷之自是辰岳諸府相繼俱陷而雲貴路梗矣

丁酉命大學士吳姓出督師給五萬金旌功以大理  
評事萬元吉為職方員外郎仍充督師軍前贊畫兵部  
尚書張國維請隨輔臣躬率六軍討賊優詔答之 癸  
卯李自成襲殺草裏眼左金王并其衆 甲寅左良玉  
引兵自池口西上屯安慶傳制襄承失守明法具在左  
良玉憫其久勞行間責令圖功自贖方國安陳可立草  
職充為事官殺賊 夏四月李自成殺羅汝才并其衆  
降將惠登相王光恩在鄖陽陰使人招汝才所部多犇



降之自成怒攻鄖陽登相光恩屢敗之自成遂築長圍以困鄖丁酉陷保康知縣石維壇死之辛丑自成遣賊將以兵十萬至禹州守將楊芬張朗先期具禮迎賊賊授偽官之任甲申下詔厲將士討賊告諭天下五

月河南所在擒斬偽官李自成在襄陽所造宮殿皆傾塌遂屯移鄧州益兵攻鄖陽王光恩禦之賊屢戰不利孫傳庭復遣高傑以兵援鄖陽擊賊敗之賊退屯襄陽拘鐵工晝夜造鐵鈎釘各萬餘謀向潼關踰越山險

戊申上諭輔臣姓奉命督師討賊自當星馳受事乃

三月以來遷延不進將出都門籌畫不固若行間何以制勝還宜在閣佐理不必督師詔趨孫傳庭作速勦寇 丙辰李自成攻袁時中殺之并其衆 巡撫河南

秦所式上言中州大勢闖曹蹂躪五郡八十餘城盡為瓦礫及草左諸賊由宛汝跨江漢旬日陷數名郡此流寇之大畧也自永城以至靈閭自宛汝以抵河岍方千里之內皆土賊大者數萬小者數千棲山結寨日事焚

掠此土賊之大畧也辦賊必須兵舊撫餘兵不及二千  
陳永福餘兵不及四千合卜從善三千人亦不滿萬此  
主兵之大畧也用兵必裕餉河南五郡淪沒河北強半  
蒿萊額賦五十萬昨年完不及二十萬撫鎮闕餉五月  
有餘此糧餉之大畧也轉餉必須民自經寇十餘載人  
烟幾斷守城修河轉運至於稚子荷旗老婦鳴柝此民  
生之大畧也撫民必須官按除目則有人稽地方則無  
官或年餘不赴或土團寄命此官吏之大畧也敗壞已

極惟願皇上速發內帑亟鍊精銳佐以土寨開荒選牧  
庶有濟乎時上召保定巡撫徐標入對標曰臣自江淮  
來數千里見城陷處固蕩然一空即有完城僅餘四壁  
蓬蒿滿路雞犬無音曾未遇一耕者土地人民如今有  
幾皇上亦何以致治乎上歎歔泣下標又上言屯田及  
車戰諸策上善之是月給事中吳甘來上言諸撫臣  
借名護藩實棄城走乞敕諭各藩并覈王永祚等棄城  
之罪上不問六月丁丑立賞格購李自成萬金爵通

侯購張獻忠五千金官極品世襲錦衣指揮餘各有差  
進孫傳庭兵部尚書總制應鳳江皖豫楚川黔勦寇  
軍務仍總制三邊鑄督師七省之印 李自成大造戰  
艦於荆襄遣老回回攻常德自成謀自王於荆其親信  
大帥二十九人分守所陷郡邑自成自隨騎兵五營營  
精騎二千步兵十四哨哨精卒三千劉宗敏總步白旺  
總騎每屯以騎兵一營外圍巡徼晝夜更番餘營以次  
休息警候嚴密人不得逃逸者追獲必磔之營兵不

許多攜輜重兵民攜妻孥生子棄之不令舉男子十五以上四十以下咸掠為養子為奴隸故每破一邑衆輒增數萬每一精兵則蓄役人二十餘其馱載馬騾不與馬衆實五六萬且百萬也雖拔城邑不聽屋居寢處布幕彌望若穹廬其甲縫絛帛數十重有至百者輕而韌矢鏃鉛丸不能入每戰一騎兵必二三馬數易騎終日馳驟而馬不疲嚴寒則掠茵薦布地以籍馬足或剗人腹為馬槽實以芻椒飼之飲馬則牽人貫耳流血雜水

中馬習見之遇人則嘶鳴思飲噉焉行兵倏忽雖左右  
不知所往雞再鳴並起蓐食犄馬以俟百萬之衆惟自  
成馬首是瞻席卷而趨遇大川則囊土壅上流雖淮泗  
諸水亂流而渡百萬合營不攜糧隨掠而食飽則棄餘  
有斷食斷鹽數月者臨陣鐵騎三重反顧則殺之戰不  
勝馬兵陽北官軍乘之步兵拒戰馬兵繞而合圍無不  
勝矣以牛金星為謀主日講經一章史一通每有謀畫  
集衆計之自成不言可否陰用其長者人多不測也其

攻城分晝夜為三番以鐵騎布圍步兵肉薄向城人戴

鐵冑蒙鐵衣攜椎斧鑿城得一輒斃即還易人以進穴

城可容一人則一人匿之畚土以出以次相繼遂穿空

旁側迤四五步留一土柱巨絙繫之去城十百丈牽絙

倒柱而城崩矣望風降者不焚殺守一二日殺十三四

或五六日不下則必屠矣殺人數萬聚屍為燎名曰打

亮城將陷以兵周布濠外縋城者殺之故城陷必無噍

類掠馬騾為上功次軍仗次幣帛衣服次珍寶其金銀



恒散棄之或以代鉛置礮中屠城則夷其城垣今後莫  
與為守立投順牌四凡破城四向負牌至村落降者即  
負牌過別村否則加兵牌所至日蹙千里性慘酷斷耳  
剔目截指折足剖心鑿體日以為常談笑對之其兄從  
秦軍來自成獲而殺之性又澹泊食無蕪味一妻一妾  
皆老嫗不蓄奴僕無子以李雙喜為養子嗜殺更酷於  
自成自成在襄陽以構殿鑄錢皆不成斬一謀士令術  
士問紫姑卜之不吉因立李雙喜為太子改名洪基以

厭之鑄洪基年為錢又不成七月間秦督兵將至留毛

賊守襄陽家口自成率精銳往河南 庚子督師孫傳

庭發兵潼關分道進討以總兵牛成虎副將盧光祖為

前鋒會河南總兵卜從善陳永福合兵洛陽之下池塞

檄左良玉以兵自九江赴汝寧夾擊賊大營移宛向雒

詔薊遼總兵白廣恩四川總兵秦翼明入衛土漢官兵

陝西三鎮兵俱隨督師進討傳庭以副總兵高傑將降

丁為中軍命秦翼明出商雒為犄角總兵王定官撫民

率綏夏二鎮兵為後勁八月辛未傳庭師次閿鄉自成  
盡發荆襄諸賊俱會於河南步賊沿河列守自汜水至  
滎澤伐竹木結筏人佩三葫蘆將渡河先驅千餘賊北  
渡總兵劉弘起以兵逐之復渡南岍丁丑牛成虎率諸  
將前驅遇賊於洛陽擊破之再敗之河岍追奔至汝州  
成虎以孤軍無繼退屯澠池九月己亥傳庭次汝州偽  
都尉四天王李養純率所部來降知賊并兵守寶豐傳  
庭進軍寶豐合圍賊堅守不下壬寅自成以輕兵來援

戰於城東白廣恩高傑盧光祖分兵逆戰却之癸卯復以精騎數千直攻官軍諸將復擊走之傳庭曰寶豐不即下而賊救大至則腹背受敵矣親督諸軍悉力攻城拔之斬偽州牧陳可新等數千級遂以大兵搗唐縣時賊家口盡在唐縣賊發精騎來援官軍已入城盡殺賊家口賊滿營痛哭誓殺官兵壬寅傳庭自朱仙鎮而南大雨六日糧車日行三十里又道淖未至士馬俱饑或勸傳庭旋師就運傳庭曰軍已行即還亦饑奚濟乎要

當破一縣就食耳甲辰傳庭復郊縣縣俱窮民集騾羊  
二百餘頃刻分鬻食盡不足給己酉命河北山西就近  
餉傳庭軍自成將步騎萬餘逆戰官軍前鋒擊斷自成  
坐纛進逐之賊披靡賊營逃亡者相屬時傳庭前鋒盡  
收草左故部皆致死於賊而高傑統諸降賊備悉賊中  
曲折自成遣其弟一隻虎逆戰三戰三北自成奔襄城  
諸軍進逼之自成屢敗而懼挑土築塙自守己食匱賊  
有饑色初自成在河南以河雒荆襄四戰之地且荒

蕪赤地千里關中其故鄉也士馬強甲天下據之可以  
霸乃謀西向憚潼關天險將從浙川間道入陝如不能  
則從楚豫下淮安金陵可襲而有也既至陝州屢敗盡  
發河上屯守諸賊以迎官軍驅所掠難民為前鋒以誘  
敵官軍屢勝輕敵日馳逐數百里河南所在皆荒諸軍  
既深入饋餉不繼丙子自成書巨牌行至官軍刻期會  
戰時襄洛豪傑並起各保寨以逐賊大者萬人少者數  
千若毛顯文劉弘起沈萬登皆起布衣為將領潛山宋

正奇集鄉兵數萬扼險隘賊不敢下承天方國安以兵  
復承天老回回屯夷陵官軍擊敗之諸縣多恢復大  
雨連旬傳庭軍乏餉壬子兵譟於汝州降盜李際遇陰  
通賊癸丑賊率精騎大至傳庭問計於諸將高傑請戰  
白廣恩曰我師困宜駐師分據要害步步為營以薄賊  
易耳傳庭恐賊遁曰將軍何怯獨不如高將軍耶廣恩  
不懌引所部八千人先去賊前鋒名三堵牆一紅一白  
一黑各七千二百人來薄官軍接戰陷賊伏中賊乘之

官軍大敗陷泥淖死者數千人高傑立嶺上望曰不可  
支矣麾衆退諸軍盡西走賊驅大隊疾追一日馳走四  
百里至於孟津官軍死亡四萬餘人盡喪其軍資數萬  
傳庭與傑收散亡數千騎渡垣曲走河北初賊驅難民  
誘官兵斬獲皆良民也傳庭不知其詐奏賊聞臣名皆  
驚潰臣誓肅清楚豫不以一賊遺君父識者憂之至是  
果敗賊別將克汝州殺僂過當戊午自成向潼關白廣  
恩擊破之孫傳庭亦回軍潼關衆尚四萬 十月辛酉



朔副總兵沈萬登復汝寧萬登汝寧大俠也聚鄉勇萬  
餘人李自成偽授威武大將軍不受鳳督馬士英承制  
授副總兵是日偽將軍馬尚志蒞任萬登潛遣謀入城  
因擁衆入誅尚志并諸偽官 壬戌一隻虎陷閬鄉即  
自成弟李過也疾走至潼關獲督師大纛丙寅賊以纛  
紿守關者乘間突入潼關陷李自成間道緣山崖出潼  
關後夾攻官軍大潰賊既入關西行一隻虎陷華陰傳  
庭及白廣恩退屯渭南賊合衆數十萬陷渭南傳庭沒

於陣知縣楊暄被執不屈死賊屠渭南陷華州戊辰陷  
商州商雒道黃世清不屈死之賊屠商州乙丑陷臨潼  
關中人心所在瓦解陝西巡撫馮師孔知寇棘急入西  
安收保俄賊至辛未師孔督兵出戰陣陷被執不屈死  
之西安陷按察使黃炯自盡長安知縣吳從義指揮崔  
爾達俱投井死秦府長史章世炯自經死紳士死者甚  
衆右都御史三原焦源溥罵賊磔死磁州道副使祝萬  
齡至學宮拜先聖從容自經死禮部主事南居業罵賊

死宣撫焦源清叅政田時震俱不受偽職死御史王道  
純大罵賊不屈死解元席增光舉人朱誼泉俱投井死  
山東監軍僉事王徵七日不食死都司吏丘從周罵賊  
死餘吏民皆相率降於賊總兵白廣恩逃而追獲降之  
初自成剽掠十餘年既席捲楚豫始有大志然地四通  
皆戰場所不得郡縣官軍旋復之至是既入秦百二山河  
遂不可制自成據秦王府偽授秦王存樞權將軍世子  
妃劉氏曰國破家亡願求一死自成遣歸外家秦藩富

甲天下擁貲千萬賊之犯秦也戶部尚書倪元璐奏曰  
天下諸藩無如秦晉山險用武國也宜諭兩藩能任殺  
賊不妨假之以大將之權如不知兵宜悉輸所有與其  
齎盜何如享軍賊平之後益封兩藩各一子如親王亦  
足以報之兩王獨不鑒十一宗之禍乎賢王忠而熟於  
計必知所處矣書上不報至西安陷秦藩府庫盡為賊  
有賊分兵徇諸縣皆陷蒲城知縣朱一統抱印投井死  
初自成在楚議所向牛金星請先取河北直搗京師楊

承裕欲先據留都斷漕運獨顧君恩曰否否先據留京  
勢居下流難濟大事其策失之緩直搗京師萬一不勝  
退無所歸其策失之急不如先取關中為元帥桑梓之  
邦且秦都百二山河已得天下三分之二建國立業然  
後旁畧三邊資其兵力攻取山西後向京師進退有餘  
方為全策賊從其計先是賊好殺掠牛金星勸以不殺  
遂嚴戢其下民間稍安堵輒相誑惑人無鬪志自成遂  
改西安府為長安榜掠巨室助餉辛未進白廣恩盪

寇將軍勦賊時上信廣恩尚未知其降賊也 李自成

分兵畧廊延中部知縣華堞知城小不支先令妻妾自縊一妾年少遣之其妾亦垂泣投繯華堞遂經死 官

兵進勦汝寧一路偽官土寇俱盡河南稍寧 庚寅上

始聞潼關失守以兵部侍郎余應桂總督陝西三邊收拾邊兵相機勦寇應桂聞命飲泣陞辭曰不益兵餉雖去何濟上默然發帑金五萬給軍應桂遷延河上不進十一月總兵王定高傑自渭南敗各帥所部奔延安

自成命賊將田斌守西安自往塞上甲午高傑聞賊至  
以兵渡河而東入山西王定奔榆林自成陷延安大會  
羣賊戎馬萬匹旌旗數十里於米脂祭墓以五百騎按  
行鳳翔守將誘而殲之自成怒親攻鳳翔陷之屠其城  
壬寅李自成發金數萬招榆林諸將以大寇繼之備兵  
副使都任及故總兵王世顯侯世祿侯拱極尤世威惠  
顯等歛各堡精銳入鎮城大集將士問之曰若等守乎  
降乎各言效死無二遂推世威為長主號令繕甲兵賊

遣偽守說三日不聽賊怒乙未賊四面環攻城上強弩  
疊射賊死屍山積更發大砲擊之賊稍却丙午賊攻寧  
夏鎮兵逆戰三敗之殺賊精銳數千自成歸西安益發  
賊往寧夏關中諸賊聞寧夏之敗數萬東奔商維出潼  
關復散入河南壬子自成復往攻寧夏丁巳李自成陷  
榆林榆林被圍諸將力戰殺賊賊死者萬人賊攻益力  
逾旬不克賊以衝車環城穴之城崩數十丈賊擁入城  
遂陷副使都任闔室自經死總兵尤世威縱火焚其家



百口揮刀突戰死諸將各率所部巷戰殺賊千許賊大  
至殺傷殆盡無一降者闔城婦女俱自盡諸將死事者  
數百人榆林為天下勁兵處頻年餉絕軍士饑困而殫  
義殉城志不少挫闔城男子婦女無一人屈節辱身者  
榆林既屠賊搗寧夏寧夏總兵官撫民迎降三邊俱沒  
賊無後顧長驅而東矣自成攻慶陽城中堅守四日力  
不支城陷備兵副使段復興董琬鄉紳太常少卿麻禧  
死之屠慶陽執韓王時賊遣偽王往關東靈閼諸路大

張偽榜移檄河南郡縣河南西境賊皆設偽官官兵守懷慶府十二月李自成遣賊入漢中不克高傑在絳州聞李自成將東渡分道東走戊辰至蒲州李自成前鋒渡河入山西巡撫蔡懋德先屯平陽至是以歲暮還太原庚辰賊至河津陷平陽知府張嶙然走太原吏民皆降賊殺西河王等三百人高傑聞平陽陷擁兵東下澤州山西郡縣聞賊至望風迎款賊遣偽牌徧行山西其辭甚悖李自成遣賊陷甘州先是鳳翔蘭州開門

迎賊賊渡河莊浪涼州二衛俱降遂圍甘州乘夜雪登  
城巡撫甘肅林日瑞總兵郭天吉同知藍臺等並死之  
殺甘民四萬七千餘人西寧衛尚堅守不下至明年二  
月詐降殺偽官賀錦等

十七年春正月李自成稱王於西安僭國號大順改元  
永昌自成久覬尊號懼張獻忠老回回相結為患既入  
秦通好獻忠獻忠厚幣遜詞以報之自成喜遂僭號牛  
金星為丞相更定六政府尚書等偽官三月乙巳李

自成自山西抵京師環攻九門丁未京城陷帝后崩  
丙辰遼東總兵平西伯吳三桂聞京師陷帝后殉難遂  
縞素發哀乞師於我

大清討賊薄山海關傳檄遠近李自成聞之大驚脅三  
桂父襄作書招三桂令舊將唐通遺三桂書勸降且言  
東宮無恙三桂不答上書其父略曰父既不能為忠臣  
桂亦安能為孝子桂與父訣請自今日雖寘父鼎俎旁  
以誘三桂不顧也書至自成益懼三桂頓兵山海關以

忠義激將吏規取京師唐通不能禦三桂殺賊騎殆盡  
初三桂諭其下曰吾不忠不孝何顏立天地間欲自刎  
其下皆曰將軍何至此吾輩當死戰遂大破賊已巳京  
城外徧張吳三桂檄共約士民縞素復仇一時都人皆  
密製素幘庚午李自成率兵六萬東行劉宗敏李過等  
從之挾太子永王定王吳襄自隨太子二王玄幘綠衣  
各一兵抱之馬上都人擁觀多隕涕甲戌李自成向永  
平丁丑吳三桂大破賊於關門賊初掠京師精銳不過

數萬所至虛聲脇下未嘗經大敵既飽掠思歸聞邊兵  
勁無不寒心自成知成敗決於一戰益驅賊連營並進  
三桂悉銳出戰無不一當百奮擊殺賊數千人賊亦賈  
勇疊進自成挾太子登高岡立馬觀戰賊衆三面圍三  
桂兵三桂兵東西馳突賊散而復合我

大清兵至繞出三桂右所向披靡莫當自成策馬走諸  
賊遂大潰自蹂踐死者數萬人諸軍分道乘之殺其大  
帥五人奪輜重無算自成以數千騎急走永平戊寅自

成遣使赴軍中議和三桂曰歸我太子二王速離京城使鐘簾如故而後罷兵自成請旋師如三桂言求和三桂許之自成拔營而西己卯三桂追賊於永平又破之賊奔竄還京師毀京城外民居數萬間并夷牛馬牆稍遲者殺之凡數萬人三桂兵壓城自成合兵一十八營以拒戰三桂進攻之連拔其八營斬首二萬自成殺吳襄首以高竿懸城上盡殺襄家三十八口三桂披髮墜鞍哭於地三軍感憤怒拔刀砍地誓殺賊丙戌李自

成自稱帝即位於武英殿偽磁侯劉宗敏扶創出平立  
不拜曰爾固我等夷也偽官皆拜宗敏不得已再拜而  
退丁亥昧爽李自成出齊化門西走先運薪木積宮內  
縱火發砲擊毀諸宮殿又燒九門雉樓火光燭天先是  
三桂知賊將西走設疑兵於西山密取酒罌數千實以  
石灰夜埋齊化門道上上覆浮土賊萬馬並驅而出踐  
罌皆穿馬足驚踣後騎相壓奔石灰迷目不可眎疑兵  
遠譟以驚之賊陣大亂三桂望城中火作知賊走繞城



而西追奔三十里賊馬騾俱重載日行數十里追兵至盡棄其輜重婦女自盧溝至固安百里盜甲衣服盈路賊兵散去者又數萬三桂徐収所棄已逾數百萬賊既得脫西走三桂復率大兵追賊至保定賊還兵而鬪奮擊破之又追破之於定州北奪其婦女二千獲輜重無算招降潰賊萬餘人自成屯真定既屢敗憤極復勒精騎擊三桂三桂兵張兩翼以進擊斬其大將三人首萬級自成大敗還真定益發兵攻三桂三桂接戰自晨至

晡未決三桂分兵疊戰自成漸引却自成中流矢墜馬  
掖兩騎馳還營即拔營西走度故關入山西三桂以兵  
逐之及關而止遂還軍京師 李自成自井陘西行至  
平陽分兵守山西諸隘並發關中兵西攻漢中陷之  
李自成復遣兵出潼關攻掠河南又遣降賊叛將馬科  
至四川略保寧一路 吳三桂追賊入山西時西部復  
攻臨洮甘肅以牽之自成數戰不勝遂棄山西走西安  
大清兵西伐李自成合賊數十萬悉銳迎戰鐵騎衝

堅而入賊披靡斬首數萬劉宗敏田見秀等俱死賊衆大潰棄西安走商雒丙子自成棄陝以兵出潼關分軍為八營三道俱下南畧地至襄邲我

大清兵既定三秦下河南入楚取荆襄李自成南奔辰州將合張獻忠獻忠已入蜀遂留屯黔陽部賊亡大半然尚擁衆十餘萬乏食遣賊將四出抄掠黔陽四境鷄犬皆盡川湖何騰蛟進攻之自成營於羅公山倚險築塹為久屯計勢彌蹙食盡逃者益衆自成自將輕騎抄

掠何騰蛟伏兵邀之大敗殺傷幾盡自成以數十騎突走村落中求食村民皆築堡自守合圍伐鼓共擊之自成麾左右格鬪皆陷於淖衆擊之人馬俱斃村民不知為自成也截其首獻騰蛟驗之左驢傷鏃始知為自成李過聞自成死勒兵隨赴僅奪其屍滅一村而還結草為首以衮冕葬之羅公山下賊諸將奉李過為首改名李繡渡湖入險山中後改名李赤心羣盜俱散亡

谷應泰曰國以民為本民以食為天故曰積貯者

天下之大命也史稱關中大祲而三輔寇盜縱橫  
周官荒政十二而興大役以業貧民至若青徐歲  
饑樊崇以起長垣歲凶仙芝作亂蓋揭竿之變往  
往由於請磬之匱也况乃汰郵驛減冗卒使亡賴  
奸人無所得衣食則益煽而為亂走死地如驚耳  
崇禎之初銳意恭儉東南織文西北游徼竝行裁  
罷而李自成以驛胥失職值饑民不沾泥等倡亂  
延安因往從之又與耿如杞潰兵相合旬月之間

衆至萬餘推為闖將蓋潰兵得饑民則嚮道既精  
饑民得潰兵則壁壘益厚又况延綏地連邊鎮俗  
嫻弓馬民多獷悍秦長西陲雄制列國唐起靈武  
終復兩京揆之自成起事雖屬毛賊實則勁旅也  
此時明察之官剽銳之將便當厚集衆師一鼓擒  
滅比之唐周上書馬元車裂宋賢謀亂鷹揚捕斬  
斯為得之而乃養癰坐大馴致蔓延此豈非計之  
失耶雖然自成之起延安也自秦入豫由蜀躡楚


轉寇關東僭號襄鄧十餘年之間曹文詔敗之於  
商雒陳竒瑜敗之於漢中左光先敗之於富平左  
良玉敗之於武關賀人龍破之於靈陝孫傳庭敗  
之於襄城亦未嘗不自服乞降投繯引決而究至  
狼奔豕突死灰復燃者則以號令乖方韜鈴不飭  
中朝無良平之謀而行間無李郭之將也乃者車  
廂峽之困自成鮮甲矣而更給票免死興平武功  
之捷自成計阻矣而乃緩兵待撫嶠函合圍之舉

自成坐斃矣而云圍師必缺又且得臣之猛按劍  
行誅節度之師同日奔潰以至嗣昌仰藥於前傳  
庭陣亡於後而天下事不可為矣自成乃更北攻  
寧夏略定三邊東搥居庸長驅京邑洎乎祿山陷  
都惟事聲色黃巢入篡大掠貲財突令言於宜春  
坐朱泚於北闕遂使銅駝榛莽鍾簾灰銷自古潢  
池之禍未有若斯之酷者也嗟乎彼自成者非有  
殊才絕力不過狡黠善騎射耳而謀主牛金星顧



君恩輩則井窺之智也孽黨劉宗敏白旺等則瘞  
犬之猛也奈何千丈之隄潰於蟻穴天府之險踣  
於困獸哉以予論之假令貨賄屏絕則將必盡材  
文法便宜則權不中制而又有武侯以興復自任  
晉公以討賊自効者即寇雖鴟張不難一舉而撲  
滅之也然則顛覆之禍固當責之廟筭歟

明史紀事本末卷七十八



總校官庶吉士臣張能照

校對官編修臣莫瞻菴

謄錄監生臣于世第